

perador per nome dil Papa a exortarlo a far le trieve con il re Christianissimo; et la Cesarea Maestà li fece risponder non era tempo di farle, et che tal cosa si trateria a Roma. Et scrive ditto Orator nostro, haver inteso da persona *fide digna* che sono stati dito Arziescovo con l'Imperador in stretti colloquii secreti, et che l'Imperador ha ditto: « Vui me avè confessà mi; bisogna mò ehe mi ve confesa vui » siehè non sarà nulla. El qual Arziescovo si dovea partir e passar in Inghilterra. *Item*, scrive colloquii hauti col Gran Canzelieri, qual la brava molto di voler far, etc. E l'Imperador ha la febre quartana; ma non la stima; e quel zorno di la febre era andato a la caza. Altre particolarità scrive, *ut in litteris*.

In questa matina, in Quarantia Criminal, fo spedito sier Domenego Trun di sier Daniel, zovene di anni 17, qual fu preso di retenir per haver ferito sier Fantin Pixani di sier Vetur qu. sier Zorzi, poi fata pace insieme; el qual sier Domenego Trun si apresentò. Hor hozi fo menado per li Avogadori, et preso il proceder, fu condanato a pagar ducati 100 a l'ofeso. *Item*, sia bandito di Venetia e dil destretto per anno uno con taia; et sia publicà tal condanation su le scale di Rialto.

Da poi disnar fo Pregadi, et leto *solum* letere di Roma e Spagna.

Fu posto, per li Consieri, dar il possesso dil vescoado di Liesna vachado per la morte dil reverendissimo cardinal Chavalicense al reverendo domino Zacharia Trivixan qu. sier Zuane, hauta dal Summo Pontifice, come appar per le sue bolle date a Roma a dì 2 Setembrio pasado. Ave: 147, 1, 3. Fu presa.

Et nota. Fu posta, essendo li papalisti cazadi.

Fu posto, per li Consieri, una taia a Vicenza, esser stà imbratà la porta di la caxa di domino Alvixe da Porto canonico, et butà fuogo in uno fenil. Chi acuserà habi lire 500, e poi poni in bando. Sapendo li delinquenti, taia, vivi lire 500, morti 300. Ave: 129, 2, 8.

Fu fato do Savii di terra ferma solamente, in luogo di sier Hironimo Querini refudò, et uno che manca; el terzo, ch'è sier Piero Zen, la Signoria terminò risaltarli il loco fin el vengi; qual è stà mandato in Dalmatia come ho scripto di sopra. Et tolti numero 28, rimase do che non si fevano tuor, sier Benedeto Dolfin fo savio a terra ferma qu. sier Daniel, et sier Nicolò Tiepolo el dottor fo Podestà e capitano a Ruigo qu. sier Francesco, i quali subito introno. Sotto sier Nicolò Salamon fo al luogo di

Procurator, qu. sier Michiel. Et questo quì avauti è il scurtinio:

*Scurtinio di do Savii a terraferma.* 241

Sier Silvestro Memo, fo a le Raxon vechie, di sier Michiel.

Sier Domenego Pizamano, fo conte a Traù, qu. sier Marco.

Sier Stefano Tiepolo, fo provedador sora la revision dei conti, qu. sier Polo.

Sier Lodovico Falier, fo ai X Officii, qu. sier Thomà.

Sier Piero Trun, fo podestà a Verona, qu. sier Alvixe.

Sier Nicolò Salamon, fo al luogo di Procurator, qu. sier Michiel.

Sier Gabriel Venier, fo avogador di Comun, qu. sier Domenego.

Sier Troian Bolani, qu. sier Hironimo.

Sier Zuan Dolfin, fo avogador di comun, qu. sier Nicolò.

Sier Ferigo Morexini, fo patron a l'arsenal, qu. sier Hironimo.

Sier Andrea Arimondo qu. sier Simon, fo proveditor a Feltre.

Sier Vetur Pixani, fo proveditor a Riva, qu. sier Zorzi.

Sier Zuan Ferro, fo proveditor sora i officii, qu. sier Antonio.

Sier Piero Morexini, fo provedador sora i officii, qu. sier Francesco.

Sier Nicolò Michiel, fo a la camera d'imprestidi, qu. sier Francesco.

Sier Nicolò Bragadin, fo ai X Savii, qu. sier Marco.

Sier Francesco Morexini el dottor, qu. sier Gabriel.

Sier Hironimo da cha' Taiapiera el dottor, fo podestà e capitano a Zividal di Belun.

Sier Andrea Mozenigo el dottor, è di Pregadi, di sier Lunardo procurator, qu. Serenissimo.

Sier Zuan Nadal Salamon fo Savio a terraferma, qu. sier Thomà.

† Sier Beneto Dolfin, fo Savio a terra ferma, qu. sier Daniel.

Sier Filippo Capello è di Pregadi, qu. sier Lorenzo. qu. sier Zuan procurator.

Sier Andrea da Molin dal Bancho, fo capitano di le galie di Baruto, qu. sier Marin.